

**BOSNA I HERCEGOVINA  
FEDERACIJA BOSNE I HERCEGOVINE  
HERCEGOVAČKO-NERETVANSKI KANTON  
KANTONALNO TUŽILAŠTVO MOSTAR  
BROJ: T07 0 KTRZ 000\*\*\*\* 05  
Mostar, 28.02.2013.godine**

## **KANTONALNI/ŽUPANIJSKI SUD MOSTAR**

Na osnovu čl.45 st.2 tč.i, čl.241 st.1 i čl.242 Zakona o krivičnom postupku Federacije Bosne i Hercegovine podižem

### **OPTUŽNICU**

#### **PROTIV**

**PERIĆ LUKA** sin Metoda i Dragice djevojački Marić, rođen 15.11.1967.godine u Stocu gdje je i nastanjen na adresi Crnići bb-Jasoč, posjeduje JMB: 1511967153751, Hrvat, državljanin BiH, završio osnovnu školu, pismen, po zanimanju zemljoradnik, oženjen, otac troje djece, od čega jedno maloljetno, vojsku služio 1989.godine u Ljubljani, nema čin rezervnog vojnog starješine, bez odlikovanja, vodi se u VE Stolac, po ličnom iskazu lošeg imovnog stanja, do sada neosuđivan, zastupan po Raguž Marku, advokatu iz Stoca

#### **Da je**

Za vrijeme rata u BiH i oružanog sukoba između Hrvatskog vijeća obrane i Armije Republike Bosne i Hercegovine, kao pripadnik Hrvatskog vijeća obrane u 07.mjesecu 1993.godine postupao suprotno odredbama zajedničkog čl.3 st.1 Ženevske konvencije o zaštiti građanskih lica za vrijeme rata i Ženevske konvencije o postupanju sa ratnim zarobljenicima od 12.avgusta 1949.godine tako što je

1. U tačno neutvrđeno vrijeme u prvoj polovini mjeseca jula 1993.godine u kasarni bivše Jugoslovenske narodne armije u Gabeli, koja je služila kao mjesto protiv zakonitog zatvaranja Bošnjaka, htijući da \*\* zv.“\*\*\*\*“ bude fizički zlostavljan, sa dvojicom NN pripadnika HVO-a došao do hangara br.2 u kojem se nalazilo više zatočenih lica te sa ulaznih vrata pozvao da iziđe zatočeni civil \*\*, pa kada je ovaj izišao ispred hangara dvojici NN pripadnika HVO-a je rekao: „To je taj \*\*\*\*“, koji je tada u strahu za svoj život i tijelo pred njima trojicom negirao da mu je ime \*\* govoreći da se zove \*\* poslije čega je jedan od NN vojnika HVO-a Perić Luki rekao: „Pa onda to nije taj“, isti odgovorio: „Jeste to je taj“, te potom pitao navedenog civila ima li automehaničarsku radnju u mjestu \*\* pa kada mu je ovaj odgovorio da ima isti mu je rekao: „E nećeš više u njoj raditi“, te su ga potom njih trojica odveli iza hangara i tu stali na način da je \*\* stajao između ta dva NN pripadnika HVO-a, a Perić Luka stajao nedaleko od njih pa su mu NN vojnici HVO-a govorili da je on \*\* koji je zapalio crkve i kuće po Dubravama kao i da on saraduje sa četnicima poslije čega su mu prijetili pištoljem uperujući isti u njega, a potom naredili da između njih zauzme položaj kao da radi sklebove i kada je ovaj to učinio dvojica NN pripadnika HVO-a su ga nogama u više navrata udarali u rebra i slabine poslije čega je jedan od istih uzeo jednu granu sa obližnjeg stabla kruške i njome ga više puta udario u predio glave posljedicom čega je \*\* počeo gubiti svijest, a njih dvojica su ga uzeli za ruke i noge i bacili niz kosinu prema zadnjem dijelu hangara,

poslije čega je neko od prisutnih NN vojnika HVO-a pozvao neutvrđen broj zatočenika i naredio im da \*\* uzmu za noge na način da su mu leđa i potiljak glave bili na betonu te da ga tako odvuku do ulaznih vrata hangara br.2, što su ovi učinili, a za svo koje vrijeme je bio prisutan i Luka Perić pa kao posljedicu navedenih udaraca kao i vučenje tijela i glave o betonsku podlogu \*\* je zadobio tjelesne povrede po cijelom tijelu od glave do pojasa i trpio je velike bolove.

**Dakle**, za vrijeme rata u BiH i oružanih sukoba AR BiH i HVO-a sa umišljajem podstrekavao druge da kršeći pravila Međunarodnog prava nečovječno postupaju prema zatvorenom civilu.

2. U kasarni bivše JNA u Gabeli, koja je služila kao mjesto protupravnog zatvaranja Bošnjaka htijući da zatočeni civili i zarobljeni pripadnici AR BiH budu fizički zlostavljani u tačno neutvrđeno vrijeme sredinom mjeseca jula 1993.godine u grupi od 3-5 NN pripadnika HVO-a došao do hangara br.3 u kojem je u to vrijeme boravilo više stotina zatočenih lica pa dolaskom do vrata hangara ista otvorio i naredio da svi zarobljenici koji su bili u Gubavici iziđu iz hangara, poslije čega su iz hangara izišli \*\*, \*\*, \*\* i \*\* pa su po izlasku iz hangara isti stali na betonski podest leđima okrenuti prema hangaru poslije čega su Luka Perić i neutvrđeni broj NN pripadnika HVO-a naredili zarobljenom pripadniku Armije Republike BiH \*\* da trčeći glavom udari u jednu metalnu cisternu koja je stajala njima sa desne strane što je ovaj morao uraditi tri puta posljedicom čega je zadobio tjelesne povrede i trpio je jake bolove da bi mu potom isti naredili da sa podesta na kojem je stajao, a sa visine od 1 do 1,5 metara skoči na glavu, a na betonsko tlo što je ovaj u strahu za svoj život i tijelo i učinio gdje su ga dočekala dvojica NN pripadnika HVO-a i nogama na kojima su bile vojničke čizme i bejzbol palicom izudarali po glavi i tijelu, posljedicom kojih udaraca ja ovaj trpio jake bolove i izgubio svijest, da bi potom Luka Perić naredio zarobljenom pripadniku AR BiH \*\* da sa navedenog podesta skoči na glavu pa kada je ovaj to odbio u strahu za svoj život isti ga je zajedno sa neutvrđenim brojem NN pripadnika HVO-a u više navrata stisnutim pesnicama udario po glavi i tijelu poslije kojih udaraca, a trpeći jake bolove je ovaj izgubio svijest te potom su NN pripadnici HVO-a naredili zarobljenom pripadniku AR BiH \*\* da sa podesta skoči na glavu što je ovaj i učinio ali se dočekao na svoje ruke pa su mu Luka Perić i neutvrđeni broj NN pripadnika HVO-a naredili da ponovno skoči, a to na način što ga je je dan NN vojnik uhvatio za ruke i stavio mu ih na leđa, a potom gurajući mu glavu prema dole natjerao ga da skoči na glavu što je ovaj učinio i zadobio povredu glave i desne šake poslije čega je istome prišao jedan NN pripadnik HVO-a i u više navrata ga udario nogom u predio slabina, a potom ga je sebi pozvao Luka Perić pa mu naredio da se ne smije braniti tj.da spusti ruke niz tijelo, a onda ga u više navrata drvneom motkom udario u predio glave i tijela posljedicom čega je ovaj zadobio više tjelesnih povreda po glavi i tijelu, izgubivši pri tome svijest, te je takođe NN vojnik HVO-a naredio zarobljenom civilu \*\* da skoči sa prije opisanog podesta na glavu što je ovaj u strahu za svoj život uradio i zadobio tjelesne povrede u predjelu lijevog ramena i desnog koljena.

**Dakle**, za vrijeme rata u Bosni i Hercegovini i oružanog sukoba između AR BiH i HVO-a kršeći pravila Međunarodnog prava nečovječno postupao prema ratnim zarobljenicima i prema zatvorenoj civilnoj osobi,

**Čime je** radnjama pod tč.1 počinio krivično djelo Ratni zločin protiv civilnog stanovništva iz čl.142 vezano za čl.23 st.1, a radnjama pod tč.2 počinio krivično djelo Ratni zločin protiv

civilnog stanovništva iz čl.142 st.1 i Ratni zločin protiv ratnih zarobljenika iz čl.144 preuzetog Krivičnog zakona Socijalističke Federativne Republike Jugoslavije.

**KANTONALNI TUŽILAC**

**Nuspahić Adis**